

Nunat allamiut suliffeqarfiutaasa nunaqavissut pigisaat suliffeqarfiit uuliasiulernerup aallartinisartup iluani sanaartortarnissaat, nassiussuisarnissaat kiffartuussisarnissaallu qanoq iliorluta inuiaqatigiittut qulakkeersinnaaneripput pillugu apeqqut tunngavigalugu oqallinnissamut siunnersuut.

(Inatsisartunut ilaasortaq Andreas Uldum, Demokraatit)

Akissuteqaat

(Inuussutissarsiornermut Aatsitassanullu Naalakkersuisoq, Ove Karl Berthelsen)

Aatsitassarsiorluni ingerlatanut maannakkut ingerlanneqartuni siunissamilu ingerlanneqartussani suliffeqarfiit nunaqavissut peqataatinneqarnissaasa qulakkeerneqarnissaa Naalakkersuisut eqqumaffigisorujussuaat.

Aatsitassanut ikummatissanullu inatsimmi § 18 naapertorlugu, teknikkikkut imaluunniit niuernermik tunngaveqarluni ingerlatsinermi unammillersinnaassuseqarsimappata aatsitassarsiorfiutileqatigiiffiit pilersuisunik nunaqavissunik atuissapput nunaqavissunillu sulisoqassallutik.

Sanaartugassanut isumaqatigiissutinut, pilersuutinut kiffartuussissutinullu atatillugu aatsitassarsiorfiutileqatigiiffiit suliffeqarfiutitsinnut nunaqavissunut piumasaqaatigisartagaat, suliffeqarfiutitsinnut amerlasuunut taakkualu sulisuinut unammilligassartaqartussaapput. Isumannaallisaanermut, pitsaassusissamut, piffissaliussanik malinninnissamut, nunani tamalaani malitassat nalinginnaasut naapertorlugit akuersissummik allagartaqarnissamut il.il. tunngatillugu aatsitassarsiornermut suliassa qarfimmi piumasaqaatit sukannersorujussuupput.

Suliffeqarfiutivut pitsaasunik naleqquttunillu piginnaanerpassuaqarput aamma aatsitassarsiornermut suliassa qarfimmi atorqeersinnaasunik. Kisianni suliffeqarfiutitta piginnaasassanik immikkuullarissunik, pitsaassusissanik ilaalu ilanngullugit aatsitassarsiornermut suliassa qarfiup iluani ujartorneqartunik aallussinerulersinnaanissaannut inissaqarpoq.

Siunnersuummut saqqummiussisumit apeqquteqaataanut maluginiaqquneqartutut, Naalakkersuisut suliniutinik taamaattumik, suliffeqarfiutitta suliassa alertussanut ingerlatseqatigiiffinnit neqerooruteqartitsivigineqartartussanut neqerooruteqarsinnaanissamut periarfissaannik annertusaanissamut sammisunik, aallartitsererput.

Ilinniartitaanerit aatsitassarsiornermut suliassa qarfimmut sammisut pitsanngorsaaviginissaat Naalakkersuisut kissaatigisimavaat. Suliffeqarfiutitta nunaqavissut isumaqatigiissutinut neqerooruteqarnissamut ajugaanissamullu periarfissaqarnissaat qulakkeerniarlugu, soorunalimi eqqortunik piginnaaneqartunik sulisoqarnissaat pisariaqarpoq. Taamaattumik suliassa qarfinnut ilinniarsiit pingaarutilimmik inissisimalertussaapput, aammalu siunissami inuusuttortatsinnut ilinniartitaanermik pikkorissarnernillu aatsitassarsiornermut suliassa qarfimmi suliffeqalernissamut sammititanik neqerooruteqarsinnaalissallutik. Aatsitassarsiornermut ilinniarsiimmi inuusuttunut ilinniartitaaneq nutaaq ukiamut aallartittussaavoq. Taamatuttaaq ukiorpassuit kingulliit ingerlaneranni PKU-mi aamma AMA-mi pikkorissaanerit suliassa qarfinni assigiinngitsorpassuarni sulisussatsinnik piginnaanngorsaanissamut sammitinneqartut ingerlanneqarput, soorlu assersuutigalugu tuluit oqaasiinut, common core, qillerummit qaqtassanik qillerineq, maskiinanik aqutsisutut

aammalu suliffeqarfiutitta sulisuinik piginnaangorsaanissamut ilinniartitsinissamullu pikkorissaanerit naleqquttut allat.

2010-imi aamma 2011-imi Cairn Energy-mut IBA-mut isumaqatigiissutit marluk taakkua takutippaat, taakkua ingerlatseqatigiiffiit suliffeqarfiutittalu akornanni oqaloqatigiinnerit pitsanngorsarneqarnissaannut sakkussaalluartut. Ingerlatseqatigiiffiit suliffeqarfinnut nunaqavissunut isumaqatigiissuteqarnissamut periarfissanik misissuinissamik pisussaaffeqaramik, aamma suliffeqarfiutitta suliassanut piviusorsiorlumik neqerooruteqarsinnaanissaannik soqutigisaqarput. Pilersuisuusussanut isumasioqatigiisitsinerit soorlu Cairn Energy-p 2010-imi aamma 2011-imi ingerlassimasai, suliffeqarfiutitsinnut taamatullu Cairn Energy-mut iluaqutaalluarsimapput. Pilersuisuusussanut isumasioqatigiisitsinerit ingerlatseqatigiiffiit sunik piunasaqaateqarnerinik suliffeqarfiutitsinnut paasinnissinnaanerulersitsipput aammalu suliffeqarfiit nunaqavissut piginnaasanik immikkuullarissunik sunik pigisaqarnersut Cairn Energy-p paasisaqarfigalugu. Tamanna aamma 2011-imi januaarimi aatsitassarsiornermut suliassaqaarfimmi pilersuisuusussanik isumasioqatigiisitsinerimi aammalu 2011-imi septembarimi Joining Forces-imi pivoq.

Siunnersuummik saqqummiussisup nammineerluni oqaatigaa pilersinniakkat tallimat pilersitsiniarnernut aallarteriigaasunut tapertaasariaqartut. Taakkuuppullu Naalakkersuisut sammisassatut eqqumaffigissallugit maluginiariigaat. IBA-mut taakkorpiapput isumaqatigiissutit siusinnerusukkut oqaatigineqareersutut, suliffeqarfiutitta nunaqavissut aamma ingerlatseqatigiiffiit akornanni suleqatigiinnissamut sinaakkusiussassat aalajangersarniarnerannut sakkussaalluartut. Kommunit suleqatigalugit sulisussanik nunaqavissunik atorfinitsitsisarnissaq, suliffeqarfiit nunaqavissut akuutinneqarnissaat aammalu ilisimasanik nuussisarnissaq IBA-mut isumaqatigiissusiaasartussani aallunneqarnissaat ingerlateqqinniarparput.

Naalakkersuisut isumaqarput annasaqaataasinnaasunut isertitassaasinnaasunullu akisussaaqatigiilluni suleqatigiinnissamik isumaqatigiissuteqarnermut ilusiliaq suliffeqarfiutitsinnut soqutiginaateqartoq. Ilusiliaq taanna suliffeqarfiutitsinnut pitsaasunik misilittagaqalersitsisinnaavoq aammalu siunissami nammineerlutik aatsitassarsiornermut suliassaqaarfiulertussami kiffartuussisinnaalersitsisinnaalluni.

Suliffeqarfiutivut nunaqavissut taakkualu sulisuisa aatsitassarsiornermut suliassaqaarfiup ineriartortinneqanerani qitiusumik inissaqartinneqarnissaat Naalakkersuisut pingaartippaat. Tamanna oqaatigereerlugu aamma erseqqissassallugu pingaaruteqarpoq, tamatta akisussaaqataalluta inuiaqatigiit ineriartortinneqassasut Naalakkersuisut kissaatigimmassuk. Namminersorlutik Oqartussat suliassat taakkua kisimiillutik suliarisinnaanngilaat. Suulluunniit piffissami sivisuumi ingerlanneqartariaqartarput aammalu ullormiit ullormut suliffeqarfiutitta suliassat aatsitassarsiornermut suliassaqaarfimmi neqeroortitsivigineqartut suliarisinnaalernaviannngilaat. Kisiannili Cairn-ip 2010-imi aamma 2011-imi qillerinerimi pisussanut pilersaarutaanit misilittakkat takutippaat taakkua suliassani annertusiartortumik peqataatinneqartut.

Sulisussatta suliffeqarfiutittalu aatsitassarsiornermut suliassaqaarfimmi ineriartortitsinermut inissaqartinneqarnissaasa qulakkeerneqarnissaanut aqqutissat arlaqarnerusut ujartortuarnissaat Naalakkersuisut kissaatigaat taamaattumillu sammisaaq pillugu oqallinnissaq qujarullugu.

Taamatut oqaaseqarlunga pilersitsiviulluartumik pissarsiaqarfiulluartumillu oqallinnissaq qilanaaraara.